

Aspedenn d'ar Werc'hez Vari Santel-meurbet, Itron Varia an Drein

Gwerc'hez Vari Santel-meurbet,
a vez pedet e Josilin abaoe ouzhpenn daouzek kantved dindan anv « Itron Varia an Drein »,
a bedas Doue da heul pedenn dalc'hus familh ul labourer-douar deol
– a zizoloas dre ragevezh Doue ho Telwenn en un dreineg –,
evit ma vefe pareet o merc'h vihan ganet dall,
hag ar gweled he devoe neuze.

Broudet gant an hevelep fiziañs,
evel m'eo deuet abaoe da zaoulinañ en ho Santual hon tadoù-kozh, niverus,
da azgoulenn sikour hoc'h erbedenn,
e teuomp da c'houlenn aluzen ar c'hras da vezañ pareet diouzh hon holl dallentezioù :
diwar-benn Doue hor C'hrouer hag hor Salver, diwar-benn hor breudeur ha diwar hor penn deomp-
hon-unan.

Dianaoudek eus Ho Mab hag eus E C'hrasoù, pell diouzh ho sell trugarezus,
ez omp deuet da vezañ heñvel ouzh dalled c'hoant ganto heñchañ dalled all,
hag e kouezhomp er foz, hep gellout sevel en-dro.

Mamm Santel an Dasprener, dibikouzit daoulagad hor Feiz,
deomp-ni ha na welomp ket zoken ez omp gwall bec'herien ;
hag en noz ma 'n em gavomp splujet enni,
digorit daoulagad hor c'halonoù, « ma ouezimp pebezh esperañs hon eus en E C'halv, pegen kaer eo
pinvidigezh ar c'hloar hor bo da hêrezh e-touez ar sent » (Efeziz 1, 18)

Pa dage enebourien hon tadoù-kozh, gant an dir pe gant an tan,
mogerioù-kreñv ar Gêr a zo dediet deoc'h,
piv a dalas ouzh o gourdrouz,
nemedoc'h-C'hwi, kentoc'h Mamm eget Rouanez,
p'oc'h eus astennet Ho torn-dreist, a zegasas ar peoc'h en-dro,
hag a roas lañs en-dro d'hor c'herzhed-ni, pirc'hirined ar beurbadelezh,
o vevañ gant ur fiziañs heñvel, evel hon diaraogerien niverus,
Hoc'h aspedomp da herzel ouzh an drougoù a sailh warnomp.

Mamm hep he far, argarzhed gant «ar gaouiad ha gant tad ar gaouiad »,
C'hwi hag a flastras penn ar sarpann kozh, « muntre abaoe ar penn-kentañ » (Yn 8, 44)
dre hoc'h erbedenn, e 1728 endeo,
pa voe pareet bugale vihan Kamorzh eus an drougoù o heskine,
ha goude-se, en ho Ti,
e tilivrjoc'h eus o azregoù kement ha kement a eneoù paour :
lakait da baouez ennomp harzhabennoù ar ravolt, huchadennoù an digompren,
beogadennoù an dizesper.

O Mamm an Hini a voe kurunennet a spern
hag a voe graet al lu gantañ gant an dud a zejane e Zoueelezh,
dont a reomp da ziskouez deoc'h an holl skilfennoù a c'hloaz hor c'horfoù,
an holl spernennoù a rog hor c'halonoù,
an holl zrein a voug hon eneoù ;
tennit anezho, ni Ho ped, unan-hag-unan,
ha ledit war gement hini eus hor c'hleizennoù balzam kadarn Ho kennerzh a Vamm.

O Mamm ken mat, ken trugarezus, ken dous, Gwerc'hez Vari,
C'hwi hag a denn kement spernenn a zo,
davedoc'h e teuomp, o klemm hag o ouelañ : ho pet truez ouzhomp !
Tarodet eo korf hon deneliezh gant ar bandemiezh-se
a ginnig lazhañ ac'hanomp, dreist-holl ar re wanañ hag ar re zilezetañ.
Kañvaouet gant ar viruz marvus-se, bac'het gant an nec'h, dispennet gant an dic'halloud,
en em welomp evit gwir evel m'emaomp : noazh, vil ha truilhek.
Hogen, eus donder hon dienez, a-un galon e kriomp davedoc'h,
« Lilienn e-mesk an drez » (Kan 2, 2), Mamm ken mat,
ned eo ket bet klevet biskoazh Ho pefe dilezet Ho pugale, na pa vefe unan anezho,
e-touez ar re o deus rekouret ho kwarez, o deus aspedet Ho skoazell, hag o deus azgoulennet Ho sikour.

Mamm Doue, Mamm an Iliz ha Mamm an holl dud,
C'hwi hag a voe roet deomp, ouzh ar Groaz, gant Frouezh benniget ho korf, Jezuz-Krist,
p'en em ginnige d'E Dad, evit daspren hor pec'hedoù,
troit war-zu Ho pugale ho sell leun a gendruer,
adenaouit ennomp an esperañs « n'eus ket kerse ganti » (Rm 5, 5)
hag hon dilivrit, rak hep Ho skoazell ez omp kollet.

Astennit ho mantell a Vamm war gement hini eus ho pugale, war mibien ar vro-mañ, fideled an eskobiezh-mañ : warnon + Remont, ho servijer, hoc'h asped, war beleien ha diagoned Ho Mab, ha war gement hini a zo bet fiziet ennon gant an Iliz.

Alvokadez, na pegen feal, diwallit dreist pep tra
ma ne glaskimp ket ar rekour eus hoc'h erbedadur hepken dre ma'z omp amprouet.
C'hwi hag a zo Kurunennadur Oberoù an Aotrou,
gouzout a rit « n'eo ket diwar ar spern e vez dastumet figez »
na « diwar an drez e vez mendemet rezin » (Lk 6, 44) :
evit ma kendalc'ho hor c'halonoù da zont da vezañ an « douar mat »-se,
e lec'h ma c'hell diwan Komz Ho Mab, da reiñ frouezh ar vuhez peurbadus,
evit ma vo difontet dreineg hon eneoù,
ha ma vo savet enno santualioù eus Bezañs an Doue Bev,
gounezit evidomp ma teuimp da vezañ gwir vugale da Zoue,
ma vezo hon aon nemetañ da chom hep E garout a-walc'h,
ha da nac'h d'E servijañ en hor breudeur.

Itron-Varia an Drein,
C'hwi hag a voem Kalon Doue, hag a dro anezhañ war-zu hon douar gloazet,
dre c'halloud didorrus hoc'h erbedenn ouzh Ho Mab Jezuz,
roit deomp, deiz goude deiz, ur galon nevez,
a c'hell lammat gant ur garantez heñvel ouzh hini ho Kalon a Vamm,
ha « kement tra a lavaro deomp », ni a vezo (Yn 2, 5).

Eñ hag a vev, a viskoazh da viken,
hag a ren gant an Tad, en Unded dirannus ar Spered Glan,
Doue, Bev ha Gwirion da virviken,
Amen.

+ Aotrou 'n eskob Remont Centène, eskob Gwened,
d'ar Sul 29 a viz Meurzh 2020